

近代中國史料叢刊續編第八十四輯  
沈雲龍主編

# 正定王氏家傳

王耕心撰

附：汪蔭祐覺華龕詩存

文藻出版社

有限公司  
印行

正定王氏家傳

江蘇省立第一中學

宗炎敬署

宗炎敬署

[www.docsriver.com](http://www.docsriver.com) 定制及广告服务 小飞鱼  
更多**广告合作及防失联联系方式**在电脑端打开链接  
<http://www.docsriver.com/shop.php?id=3665>



[www.docsriver.com](http://www.docsriver.com) 商家 本本书店  
内容不排斥 转载、转发、转卖 行为  
但请勿去除文件宣传广告页面

若发现去宣传页面转卖行为，后续广告将以上浮于页面形式添加

[www.docsriver.com](http://www.docsriver.com) 定制及广告服务 小飞鱼  
更多**广告合作及防失联联系方式**在电脑端打开链接  
<http://www.docsriver.com/shop.php?id=3665>



此譜十冊九本  
琴瑟板枹  
弱裏方鼓  
精舍

正定王氏家傳敘錄

敘曰學不足以知一心胡以爲身謀識不足以知一家胡以爲國與天下謀此皆君子所宜急乃泄泄以從事可憂孰甚焉耕心無狀晞道誼之原莫能徹其涯涘唯於先世文獻仰止旣久確知其會通所在此家傳之所繇箸也我王氏奠居正定禩踰五百仕學相引十有四世命世之傑或接迹古賢篤守恆心無所失墜者亦項背相望而求諸家乘記載蕪浩莫能統一若不亟加譔集且虞湮沒無傳故過不自揆廣稽旁證理而董之謹次爲傳以詒後人務宏追遠之

規遂違退讓之雅匪敢專也有所不得已者在也其  
論述大例則一本史氏或加埤益必以比義爲斷若  
掇拾凡陋以累我先人則有所不忍增不知誰何之  
美以誣我先人亦有所不敢得失之故我先人之靈  
爽實式憑之雖爲不知者所詬病無恤焉此義法所  
在小子所嘗盡心者也烏呼尊祖故敬宗敬宗故收  
族收族之制雖末繇復尊敬之誼烏可不求其本然  
而志不立知不致視一家如秦越能契性命之奧者  
誰歟能擴兼善之量者誰歟能不朽其業以爲祖宗  
光者誰歟此尤小子所深懼且彷徨四顧累涕增欷

不能自己者已後嗣達人其亦有取乎此正定王氏家傳五十首總六卷敬次目錄如左光緒十四年太歲在戊子冬十月校定訖付汗青可繕寫其十一月哉生霸弟十九世裔孫耕心謹撰

始祖清源公家傳

四世祖太和公家傳

封中憲大夫開封府知府七世祖後泉公家傳

山東按察使司副使整飭臨清兵備道八世祖方山公家傳

光祿寺少卿九世祖紹山公家傳



膠州州判九世本生祖見山公家傳

山東左布政使九世從祖思山公家傳

霍州學正十世祖視亭公家傳

贈文林郎宣化縣知縣十世族祖尊思公家傳

附學生十世族祖奕思公家傳

右弟一卷

石埭縣知縣十一世祖百成公家傳

附學生十一世族祖君錫公家傳

太常寺卿十一世族祖恆碣公家傳

贈朝議大夫知府銜永定河北岸同知十一世族祖

水潭公家傳

附學生十一世族祖軒明公家傳

肇慶府同知十一世族祖紫鉉公家傳

贈修職郎句容縣丞十二世祖潔齋公家傳

附學生十二世從祖和璞公家傳

恩貢生十二世從祖文懿公家傳

廣西右布政使十二世族祖止庵公家傳

福州府知府十二世族祖柏崖公家傳

右弟二卷

婁縣縣丞十三世祖厚庵公家傳

任縣教諭十三世從祖蘅皋公家傳

孝子十三世族祖少梅公家傳

南康府知府十三世族祖奕臣公家傳

翰林院孔目十三世族祖瀛一公家傳

萊州府知府十三世族祖樛庵公家傳

處州府知府十三世族祖澂齋公家傳

臺灣鎮左營參將十三世族祖子聘公家傳

右弟三卷

贈通議大夫兩淮鹽運使太高祖廓亭公家傳

樂昌縣知縣十四世族祖眉庵公家傳

海州州判十四世族祖香巖公家傳

饒陽縣教諭高祖漁湖公家傳

龍縣訓導十五世族祖均庵公家傳

贈文林郎夏縣知縣曾王父卜臣公家傳

浙江按察使本生曾王父椒園公家傳

附學生王父琴舫公家傳

知州銜汾陽縣知縣從祖遠亭公家傳

兩淮候補鹽運使司經歷先考鞠龕公家傳

鹽提舉銜江蘇候補知縣世父梅叔公家傳

知府用武定府同知從父五橋公家傳

翰林院檢討從父石廬公家傳

右第四卷

十一世族祖妣邵夫人家傳

十二世族祖妣梁夫人家傳

十三世祖妣梁孺人家傳

十五世族祖妣劉太君家傳

本生曾王母傅淑人家傳

王母傅太君家傳

右第五卷

王氏先正會傳

王氏先碩人會傳

右第六卷

第十九世裔孫官毅審定官澄夔立譯柳官智官紱  
宗炎官穉官潛襄閱二十世裔孫海琳海觀海華海  
壽海年海康海容海崧海昆海岑海諶海鑄海曾海  
慈海筠海鈞恭校

正定王氏家傳敘錄竟

正定王氏家傳卷第一

第十九世裔孫耕心著

始祖清源公家傳

公系出太原王氏諱大賢先世山西清源縣羅谷都西峪村人有明洪武三年以選充真定衛右所小旗始遷真定遂爲真定人字不傳後嗣號稱清源公楬先籍也公家真定卜宅城北之權城村及卒葬城東三里屯今瑩兆存焉或謂公所居亦在三里屯蓋誤子三曰林曰思忠曰福廣

十九世裔孫耕心曰公遷真定迄今五百二十年保



世滋大宗支繁衍而數典者或致忘祖殆非所以承先澤也清源於元屬冀甯路於明屬太原府真定於元屬真定路於明屬真定府清源今日清源鄉并入徐溝縣真定自雍正後乃改稱正定而新修正定縣志於前世縣名宜書真定者皆改爲正定義例疏謬不足依據此皆吾宗所宜知也相傳公始遷時夫婦二人以獨輪車至衣衾釜甑外無長物故清源以上世次無徵焉居真定後文獻相承譜牒咸備乃彬彬然無缺軼矣自公寄迹兵農傳數葉無顯者而每以潛德懿行見推鄉黨四世祖太和府君開誠化俗令

聞九箸及七世從祖柏軒府君始登仕籍爲學官八世祖方山府君始以科第起家致身通顯繇是三百年來繼繼繩繩守業勿替號吾縣箸姓徵門閥者必及焉蓋皆公之詒謀有以啟之此尤吾宗所宜知也夫世家大族皆以天爵爲盛衰而人爵其後焉者也故當其始莫不崇德懋功然後世業隆起慶及子孫及其衰亦莫不裂冠毀冕然後身名兩敗辱及先祖亞聖之訓乃百世通誼旣昭然矣而妄庸之士每以門祚旣崇轉忘先世功德蔑棄禮法逐欲忘歸大則侮世殃民立見禍敗小亦辱人賤行下伍輿臺乃猶

坦然向人無意內訟不知祖宗有靈痛哭地下者固  
已久矣嗚呼家道升降之原天人相與之際可勝歎  
哉耕心少別聖黨壯無學術而於木本水源恆久不  
忘故因論次公傳慨然太息輒附鄙說以質吾宗夫  
盛衰之理海內名族莫不皆然吾宗得失詎能獨外  
有志之士苟外治方策內克身心獨善兼濟孳孳不  
已天人之故旣通轉移之境斯闢果能無忝先祖自  
然福被子孫矣明哲君子通材子姓其念之哉其念  
之哉

四世祖太和公家傳

公姓王氏諱順字用和直隸真定人考亨公少業農不甚解文字而天資朗悟敏於剖斷鄉人有疑就公決公輒以片言析是非皆唯唯退謝莫能置詞久之名漸著排難解紛無虛日鄉黨畏公甚於畏長吏終公世鄉無訟獄而公開誠接物謙謙自牧終其身無名利心故遠近慕敬之號稱太和先生而不名順德府有疑獄久不決巡按御史檄知府必欲得其情知府難之一老吏進曰真定有太和王先生者雖布衣然持行高有聽斷才試與謀或得當焉知府以爲然使使者聘公公辭焉使者再請乃往知府告以故問

策所出公使知府訊兩造而自屏閒聽其辭訊已謂知府曰某囚某辭中有罅隙繇此批導之情僞可立判也知府諾一訊而服讞遂定獄上巡按驚異之移檄褒美知府悅推公爲上客疇以金幣辭不受乃以禮遣歸繇是名益著賢豪長者皆願納交而公無所矜伐謙抑如故也卒年失考順德之役在有明宣德閒子三瑄璋琪

十六世裔孫耕心曰正定王氏肇基於清源種德於太和下逮後泉方山乃昌厥宗今之三大門皆太和子孫也而太和之名知者蓋鮮詎非後死之責哉蓋

世族之陋莫甚於忘忽先世之潛德而惟徵名爵苟懲其陋則振公之緒者必有人公乃大慰公益不朽矣同里梁玉立氏清標嘗爲公傳稱公有王彥方之風而以限於資格不獲用世爲公惜是固然矣而耕心所深惜者乃在彼而不在此吾宗明哲不知又以鄙見爲何如也

封中憲大夫開封府知府七世祖後泉公家傳

公姓王氏諱佑字天眷號後泉直隸真定人始祖大賢原籍山西清源縣有明洪武三年始遷真定後嗣號清源公清源子林林子亨是爲公高祖亨子順順

號太和先生是爲公會王父太和子璋璋號東原翁  
是爲公王父東原子連連號潛德翁是爲公之考東  
原俶儻有節概潛德孳孳樂善好施濟鄉黨皆推重  
之公少治舉業無所就而篤守古訓廉隅自好非禮  
弗履潛德府君蚤世公事王父及妣賈太君盡敬盡  
養無毫髮過東原府君篤愛之嘗曰承先業啟後昆  
必在此兒矣公每以失學自訟教諸子有法度以冢  
子貴封中憲大夫河南開封府知府及冢子卒更以  
所以教子者教諸孫諸孫復繼起公乃以壽考終年  
八十有九時萬曆九年也公抑抑自下樂道人之善

子孫雖貴顯足迹未嘗及公門治家儉約衣無紈綺  
食不重味蓋有古敦龐長者之風焉子四長撫民累  
官山東按察使司副使整飭臨清兵備道次育民次  
新民儒官次澤民

十三世裔孫耕心曰竊觀家乘見公教子若孫勤勤  
精到無文飾意蓋皆出於身體力行非襲故紙以講  
學者所及焉渾渾爾噩噩爾溢三百年間公之風者  
猶不敢萌佻薄念誠之所及遠矣哉

山東按察使司副使整飭臨清兵備道八世祖方山  
公家傳



公姓王氏諱撫民字仁甫號方山直隸真定人考佑封中憲大夫河南開封府知府公繇嘉靖二十年進士授戶部廣西司主事累遷郎中外擢河南開封府知府性通敏有吏材官戶部時督理太倉銀庫適有僞銀納官之弊公疏請納銀者皆鑄官銜匠名於錠以備稽覈朝議躩之遂箸爲令初莅開封時有積案三百餘宗不數月皆訊決無枉縱府人稱神君焉居官風裁棱棱無華飾無私謁後遷山東按察使司副使整飭臨清兵備道卒於官年四十有一時三十四年也子三蔚光祿寺少卿藻山東左布政使薦山東

膠州州判

十二世裔孫耕心曰公強仕徂謝治勩不多見然廉以持身明以莅政綜其大端已足詒似續矣厥後子孫濟美循良踵起有以哉

光祿寺少卿九世祖紹山公家傳

公姓王氏諱蔚字國光號紹山直隸真定人考撫民山東按察使司副使整飭臨清兵備道公繇隆慶五年進士授山東滋陽縣知縣滋陽多宗室無賴最號難治公至持正不阿一裁以法人不敢犯數年縣大治擢南京戶科給事中督理後湖黃冊悉屏宿蠹都

人稱之閱五年遷尙寶司少卿旋擢北京光祿寺少卿未赴以憂歸公少時刻苦力學有文名立朝侃侃不畏強禦官戶科時嘗極論屯田積弊復抗疏劾罷授戶部右侍郎胡執禮及右都御史謝鵬舉以是邪黨皆側目迨憂居竟以被論除名終於家萬厯二十一年卒年五十有一公居鄉篤恩誼所周恤無慮數千百人退處十年角巾布服翛然自得其沖淡尤不可及云繼嗣子兆吉山西霍州學正

十一世裔孫耕心曰明白萬厯後小人道長君子道消士大夫少箸風節輒掇奇禍繇是頽墮馴致滅亡

卒無覺悟通識憾焉公正色立朝無所貶詘以未躋  
顯位僅獲廢棄殆有天幸然讒人高張賢士無名沿  
索其流弊所極彌足悲已

膠州州判九世本生祖見山公家傳

公姓王氏諱薦字國士號見山直隸真定人考撫民  
山東按察使司副使整飭臨清兵備道公少有宿慧  
甫冠與伯兄紹山仲兄思山兩府君皆以治舉業文  
有盛名而公尤著後兩兄皆登第公獨不遇晚繇歲  
貢生授山東膠州州判恥以送迎絙歲月自免歸萬  
曆四十二年卒年六十有八子二兆慶附學生兆吉

霍州學正少出嗣爲伯兄後

十一世裔孫耕心曰公以舉業文見推於鄉黨乃恆  
歛然不自足人多怪之蓋科弟之外猶有事在公旣  
稔知之論者或不及知爾近世治舉業者乃并文藝  
不自反遽積怨尤以貽通識笑陋何如哉然則公所  
失者僅其一公之所得猶處其二焉此又子姓治舉  
業者所宜盡心也

山東左布政使九世從祖思山公家傳

公姓王氏諱藻字國華號思山直隸真定人考撫民  
山東按察使司副使整飭臨清兵備道公繇隆慶二

年進士授南直隸甯國府推官署宣城縣知縣內擢  
禮部祠祭司主事改廣東道監察御史巡視中城出  
巡兩浙鹽政巡按山東旋還朝巡視京營當是時江  
陵張居正當國諸附麗者恆得美秩公獨孤行已意  
無所阿比有挽以共投門生刺者公辭焉居正母路  
出山東餽謁者駢道公方爲巡按獨不往及巡京營  
復論劾居正所親厚者以是積忤居正意幾爲所中  
賴銓曹持以公論得無恙但藉年例外轉按察使司  
副使分巡河南道人皆爲不平公夷然也初知宣城  
多惠政經畫一條鞭法利民尤大及巡兩浙執法不

撓鹽政大起分巡河南時有礦盜倡亂公嚴緝皆就  
捕復有妖黨縱橫公設方略解散之全活甚眾萬歷  
十年遷山東布政使司參政分守濟南道旋署布政  
使越二年以憂歸服闋除陝西參政分守隴右道旋  
改按察使司副使整飭莊浪兵備道莊浪僻在邊垂  
地方雲擾會以歲祲邊餉屢空士卒嗷嗷且激意外  
變公乃議多增鹽引而使鹽商納糧餉於官繇是商  
皆應募不兩月所納粟已支一歲是年秋成復稔士  
馬飽騰邊圉遂安公乃乞病歸有終焉之志既閱視  
甘肅給事中李汝華及巡按直隸御史安文璧交章

論薦詔賜金幣復起爲按察使司副使整飭霸州兵備道二十年遷河南右布政使尋轉山東左布政使時東海有倭警議沿海設兵而以乏餉爲憂公爲別籌餉源糧乃不匱已而歲大饑民多流亡公議以備倭軍糧四萬石振之民獲蘇醒所拯無筭司庫收支胥吏爲奸畸輕畸重州縣以爲鉅患公復議出納之際使解官自兌宿弊遂絕二十二年以疾致仕甫兩月終於家年五十有一公少有至性潛心道誼通周易好宋五子書其爲學以主忠信爲本以希聖爲歸胸有統會視聽言動靡不中禮莅政精勤案無留牘



而尤以清節著初署山東布政使吏以羨餘進公不納時宗藩祿糧多缺乃以所羨償所虧宗藩德之分司隴右時州縣解紙贖心紅之屬亦不取及再任山東吏進羨餘萬餘金公悉報撫按存爲公費已請以三千金修文廟登州蓬萊罹水災多死者乃以所餘充振資民大感悅撫按皆敬異同年生張鞏昌謂公清介太過以爲大愚而山東高副使者方官井陘道每謂公鄉人曰此我山東二百年所未有也當是時以方岳負海內重望者公實稱首云其居家孝友肫摯終身如一日自奉儉樸外無華飾內絕聲色及告